

■ GLOSSA

Burkini, chamischa surengiu e Milo Moiré

DA SILVIO CAMENISCH

Avain nus in nov terror da virtids? Crai bain. Ma da far canera cun «nossas» valitas «nossas valurs» ha gi l'effect cuntrari dal vuli. Ina tgilada grondiusa. Tge clientella turpegiusa en nossas fatschentas da moda! Burkini da la nova collecziun d'atun pli che dumandads. Na vegnan betg suenten cun reediziuns. Ils «satgs» van meglier che bikini e tanga, tar las nossas, che turta da nuschs, Fred e Franz, chamischa stailalva, bandiera per il pievel.

Burkinis èn vairs schlaghers. Quels èn cult. Jau hai ina sin mes pult. Vossas bellas chamischas surengiu, umens, èn er cult. Milo Moiré è er cult, sas tgenina? Tschertga en internet, in, dus clics, has ella, la lindorna niva, die Nacktschnecke. Flot fiss uss in selfie dad ella, Milo Moiré, enstagl mes chau blut si qua central. Quel han ins vis.

Ils vestgids da bogn entirs da la designra, Aheda Zanetti, èn bels. Premi d'architectura merità, sto dar tiers tgi ch'ha in zic senn per estetica, u ch'ins n'è betg sincer. Noss ambassadur Salvader da las auas ha er gi en il burkini per l'um tar ses batten da l'aua en il Laghet la Greina.



Bain. Las medias, las ru-mantschas, èn curridas suenten ed han mussà. Grazia. Mal midà. Er il burkini per l'um è dumandà. Ston mo ils dretgs al dretg lieu il dretg temp esser pronts da purtar. Il temp pleda absolut per ils dretgs, absolut.

Qua schicanescha ed umiliescha la polizia da l'urden moral ina cun burkini avant tuts! «Trai or tes satg! (La polizia è per ti cun quella estra. Il nov respect da l'autorità?) Nus lain vesair betg mo tia fatscha, er tes bel corp! Nus lain vesair dapli, lain vesair tut! Lascha star tes satgados, siglientain nus, controllà! Uss va, e na ve mai pli qual!» Quellas vegnissan a nus trasora la sera sper il lag!

Cun vossas chamischas suls venters giu, essas vestgids top, umens. Quellas dastgais mussar: a messa solenna, en tenda da festa

da la auta finanza, capitalism da rapina, en salas da la classica, en chastels dad auta cultura. Cun ils nobels, per ils nobels e surdals nobels. Quellas chamischas sur venter giu da la surabundanza èn en trend, er ils crappai, ils perdents, portan chamischa surengiu. Guarda tge fluriziun! Insla Mainau pur! Burkini per mintgin! Ina cultura da bainvegna, ma betg creschi sin noss ladimer.

Qua chatscha sin porta burkini, là cultura da bainvegna. Arriva l'artista blutta, Moiré, sin il Plaz, tut che sa ferma. Il traffic stagnescha. Il pievel fa selfies. Er quels che fan canera fan qua bufatg. Ins dastga ir vidlonder e dastga tutgar il corp da l'artista sura e sut, tge che ti vul. Tge chatschim, morder ventrigs e bratscha per vegnir tar il sieu, er dals noss. Uschia è quai.

Anc quai: Maria purschella, la mamma da Jesus, cun vestgi dal corp entir!, avess oz schlettas chartas tar tschertins che fan canera, er dals noss, sche ti dumondas mai. Pir ses ami e partenari da vita, Giusep, he, cun sigir sur givè. Betg da patratgar en in tren da la retica, en il bus da Cuira, in curs da posta en Lumnezia u nua.